


## СВЯЩЕННАЯ ЦЕРКВИ ХРИСТОВЫ СКИНИЯ.

Четырми ключи отмыкаемая. Или сокровенная Божия Тайинства четвераким разумом ежесть; ЛИТЕРАЛЬНЫМ, АЛЛИГОРИЧНЫМ, АНАЛОГИЧНЫМ, ТРОПОЛОГИЧНЫМ.

ТОЛКУЕМАЯ: Горе вам книжницы, яко взяте ключ разумения, сами не входите и входящих возбраняете. (от Луки гл. 11 стих 52)



Тебе дам ключи, (Матфей 16)

Невходяи дверми - татѣ есть и разбойник. (Иоанн 3)

КЛЮЧ 1: Аналогичны.

КЛЮЧ 2: Тропологичны

КЛЮЧ 3: Аллегоричны.

КЛЮЧ 4: Литералны.

Четверакни ключ Священныя Скиния, церковныя проходы отверзающіи или четверогубыи Священныя Писаніи разум.

ОСВЯТИЛ ЕСТЬ СЕЛЕНИЕ СВОЕ ВЫШНИ. (Псалом 45)

СЕ СКИНИЯ С ЧЕЛОВЕКИ ВЕСЕЛИТСЯ С НИМИ, И ТИИ ЛЮДИЕ ЕГО БУДУТ, И САМ БОГ БУДЕТ С НИМИ, БОГ ИХ. (Апокалипсис 21)

Вельможный господин друже мой по премногу пречетнейший. В новая ведет ум от риторики к небесноя, тебе руководствуя, ибо всегда от несовершенныя к совершенным кождо естество рястится.

Крепка и храбра убо рука есть мирскаго витийства, сила и храбрость колико благороднее и больше есть, еликим небесная лучша суть земныя и священная языческия. Сия есть оная истиннейшая умов царица, яже злобе искореняет, добродетеля насаждает, непокорливых преломляет, отступников восхощает, необузданныя удержавает неукротимыя побеждает, везде царствует, всюду повелевает на всяком месте триумфует, оная управляет, сердца словеса и перси умягчает. Но понеже честная Священнаго ветийства Скиния не всем есть проходна. Сего ради четверообразный ключ нам с Небес дается, ко еже отверзати сию священную дверцы сердец палату, убо сей четверообразный ключ зде тебе пречестный господине преподаю. Прими благодарною рукою и не тако от дела яко от залога вещь разсмотри.

Аще и отсудствует силы, обаче есть похвальная воля. Сея азъ удоволена непщую быти Бога, вшея вельможности молебник и служебник Стефан Еворский, митрополит Рязанский и Муромский.

## ПРЕДИСЛОВИЕ.

Сосуд оный избранный проносящий во языцех имя Господне. Павел божественнейший пиша ко евреом послание две в Ветхом Запвете скиний воспомяне во главе 9-той. Первую убо скинию, в ней же бяше трапеза и предложение хлебов, и глаголашеся Святая. Другую же скинию, яже бе завесою закрыта, и глаголашеся Святая Святых. Тамо бяше кадило, по всея Завета манна, жезл Ааронов и скрижали Завета. Над сими же бяху два херувима с распостёртыми крылами олтарь освещающии. Идет далее божественный Павел, глаголет: первую скинию быти общую священником. Последнюю же глаголет ни единому входну быти, но единому токмо архиерею, и то единое в лето отверзаемая быти, не неведем сие образ быти Девы Богоматери, яко лепотно мати наша Святая Восточная Церковь на праздники Богоматере сие послание прочитати обыче. Обаче неразгласно будет аще оная сугубая скиния Христову Церковь предизобразати речется. Ибо и зде аки сугубая видится быти скиния едина Святая, другая Святая Святых.

И к первой убо всем во Христа верующим является вход двери Крещения. В ню же повнегда внити им имеют преизобильну трапезу, и на ней хлеб предложения, в покланяемой Евхаристии Таинстве. Уже аще хощещи инную скинию, глаголя оную Скинию сокровенную Священныя Писания Тайну. По истинне сию сень завесою закрыту быти кто невидит, кто в ней два херувима; сиречь Ветхий и Новый Завет не без своих их засѣнѣй (*заслонов, заграждений*), то есть неудобнейшия не исповедует. Всея прочее последняя Скиния Святая Святых нареченней не ко всякому входити поущено, сиречь не всякому дано есть разумети Тайны Божия яко же свидетельствует несозданная Истинна. Обаче аще кто онамо внити покусится кроме дара Божия, очеса отверзающаго, и Духа Его сокровенная объявляющаго, подобает аще к сему дарованию имети четыре ключи видений Божественнаго ими же сию сѣнновиднѣйшую (*затенѣнную*), купно же и запечатнейшую Таин Божиих горницу возмог бы отверзти, и о сем негли четверообразном видении ключей Спасителя нашего Сладчайшего Иисуса, фарисеом поносне рече; горе вам книжницы, яко взясте ключ разумения, сами не входите и входящим възбраняете.

Прочее четверообразныя оныя Священныя Скинии ключ глаголя быти:

### ЧЕТВЕРОГУБЫЙ СВЯЩЕННЫХ ПИСАНИЙ РАЗУМ:

ЛИТЕРАЛЬНЫЙ	или	ПИСЬМЕННЫЙ,
АЛЛИГОРИЧНЫЙ	или	ИНОСКАЗАТЕЛЬНЫЙ,
АНАЛОГИЧНЫЙ	или	ВОЗВОДИТЕЛЬНЫЙ,
ТРОПОЛОГИЧНЫЙ	или	ПРАВОУЧИТЕЛЬНЫЙ.

О сем прочем четверогубом ключе зде вкратце побеседую потом да будет.

## ПАРАГРАФ ПЕРВЫЙ.

О четверообразном Священной сѣни (*комната, покои*) ключ или о четверогубом Свящныя Писаний разуме.

Сенс (*sense – сознание, значение*) или разум Священного Писания обще сугуб есть, писменный и таинственный, поразделяется аки род во своя виды, на разум аллигоричный, и тропологичный и толикую кияждо.

**Литеральный** разум есть по себе историальный, иже ближайший и несредственне чрез самыя речи знаменуются. Таков разум является во Священных книгах историальных яко в книгах Иисуса Навина. Судей, Руфы, Царств 4, Паралипоменон 2, Ездры 2, Товит, Иудифы, Есфири и прочая.

**Аллигоричны** разум есть, егда речи Писания, кроме разума литературного, его же имеют. Знаменует нечто надлежащее к вере, тако наприклад; егда глаголет Апостол к Галатом во главе 4-й. Авраам имяше два сына, единого от рабыни, другаго от свободныя, сей есть и литературный разум и аллегоричный.

Литеральный поелико знаменует Авраама патриарха и имевша два сына от рабыни Исмаила, от свободной Исаака. Аллигоричный, поелико знаменует Бога, иже имеет два народа, единого иудейска от синагога другаго христианска от Церкви. Сего под свободною Благодати Христовой, онаго под работою закона Моисейска. От онуду же Апостол прилагает; не есмы чада рабыни, но чада свободныя. Таковаго аллигоричнаго разума наполнены суть Свящныя книги.

Зде наприклад продание Иосифово ввержение в ровь (*яма, темница для преступников*), царство его во Египте, изведение чрез Моисея, проход сквозь Чермное море. Вся сия аллегоричие Христа знаменует. Зде; камень воду точащи, зде манна, зде Агнец Пасхи, и прочая. Идеже всеми сими Христос Господь аллегоричне разумеется.

Аналогичныя разум есть, егда речи Писаний кроме разума литературного его же имеют, знаменуют нечто надлежащее к Жизни Вечной или к Церкви Торжествующей. Яко наприклад; пришествие в землю обетованную, знаменует пришествие наше из Египта сего мира в землю Небесную оную, о ней же рече Давид; верою видети Благая Господня на земли живых.

Тропологичный или нравный разум, есть егда речи Писания кроме разума литературного, его же имеют, знаменуют нечто надлежащая ко еже право изобразити нравы, или любве делу обучити. Тако наприклад, оное апостольское из Второзакония; дане обратиши уст вола молотяща. Тропологичныя знаменует, яко учителяе долженствуют свою подобающую довольность имети.

Всии сия предреченыя разумы четыре заключаются сими стихами; Писмо делом учит, чему вериши аллигория, нравъ что твориши. Чего чаеши аналогия. Сия суть четыре ключи, имиже отмыкаются внутренняя таин Божиих сия суть четыре животная колесницу Славы Божией возяща, сия суть реки. Ими же рай Церкви Христовы напаяется. И аще церковныи ветия от сих четырех источников непочерпнет струи весьма бесплоден есть и сух. От онуду же церковным вѣтымъ поучение сострояти хотящим, первое прибежище есть к сим четырем рекам, наприклад; да будет вместо Фомы оная у Луки словеса.

### **Вниде Иисусъ въ весь нѣкую.**

Первым взором неплодна видится ко глаголанию материя. Что убо творити подобает; возми предреченши ключи, отверзи вышшая речей внутренняя и обрящещи пространнейшее слова поле, ибо предреченная Священнаго Писания речи по четверогубому разуму тако изтолкуеши, наприклад;

### РАЗУМ ЛИТЕРАЛЬНЫЙ.

Вниде Иисус во Вифанию, иде же живяху две сестры Мария и Марфа со своим братом Лазарем.

### РАЗУМ АЛЛИГОРИЧНЫЙ.

Вниде Слово Божие в Марию чрез воплощение, и zde востече в похвалу преблаженной девы, под аллигорию, и речеши; яко ров сея веси есть смирение преблаженныя девы, вал чистота, башни вера, надежда любовь и прочая.

### РАЗУМ ТРОПОЛОГИЧНЫЙ.

Входит часто иисус во Вифанию, сиречь душу благочестивую.

Вифания бо сугубо имат знаменованіе:

Перво Вифания знаменует дом болезни и туги, сиречь яко тамо Лазарь болезнями и скорбями и его сестры печальми быша удручены. Тем же от ипофесиса взиди в к фесису. Наприклад; сладостен Христу Господу вход есть и любезно обитаніе тамо. Идеже душа усердное Богу представляет послушаніе и туги подъемлет терпеливо.

### РАЗУМ АНАЛОГИЧНЫЙ.

Вниде Иисус в небо, идеже Мария и Марфа, сиречь два рода человек, иже zde в мире быша зрительи и действительни, ибо Мария слышавшая Слово Божие знаменуют жизнь зрительную, Марфа же яже печешися и молвивши о мнозей службе являет жизнь действительную. Но виждь какову действительную жизнь сиречь оную, яже была бы приближена зрительне жизни, яко же Марфа бе сестра, ибо не всякая жизнь действительная ведет в Небо, разве она яже есть южика (*имеющая один удел с другим*) зрительне.

## **ПАРАГРАФ ВТОРОЙ. О СОЗИДАНИИ СВЯЩЕННОЙ СКИНИИ ЦЕРКОВНОЙ.**

Созданіе zde разумей Скинии Церковной, самое священное Писаніе еже на две части разделяется, на Ветхий Завет и Новый.

### ПУНКТ 1: О КНИГАХ ПЕРВАГО ЗАВЕТА.

Книги Ветхаго Завета суть.

Бытіе иматъ глав	50	Экклісиаст	12	Царств вторыя	24
Исход	40	Премудрости	19	Царств третія	22
Левиты	27	Иисус Сирахов	51	Царств четвертыя	22
Числа	37	Исаия	66	Паралипоменон 1	29
Второзаконіе	34	Иеремія	51	Паралипоменон 2	36
Иисуса Навина	44	Плач Еремии	5	Ездры 1	1
Судей	21	Варух	6	Ездры 2	9
Руфы	4	Иезекииль	48	Ездры 3	16
Царств первыя	31	Даниил	14	Неемія	13
Товит	14	Осія	14	Аввакум	3
Иудифы	16	Иоиль	3	Софоній	3
Есфиры	16	Амос	3	Аггей	2
Иов	42	Авдій	1	Захарія	14
Псалтырь	150	Иона	4	Малахія	4
Притчи	37	Михей	3	Маккавеов	16
Песни песней	12	Наум	3		

## ПУНКТ 2: О КНИГАХ НОВАГО ЗАВЕТА.

Книги Нового Завета суть сия:

Матфей имать глав	28		К коринфом 1	16
Марк	16		К коринфом 2	13
Лука	24		К галатом	6
Иоанн	21		К ефессеом	6
Деяния Апостолов	28		К филипписиом	4
Иакова послан.	5		К колассаем	4
Петров послан.	5		К солуняном 1	5
Петрово 2 послан.	3		К солуняном 2	3
Иоанново 1	5		К Тимофею 1	6
Иоанново 2	1		К Тимофею 2	4
Иоанново 3	1		К Титу	3
Павловы послания к римляном	16		К Филимону	1
			К евреом	13
			Апокалипсис	22

Знаменай яко Нового Завета писателие и творцы суть осмь. Матфей, Марк, Лука, Иоанн, Иоаков, Петр, Иуда, Павел. Восемь душ спасошася в ковчеге Ноеве что от туду ковчег Ноев есть Церковь Христова, яже на верных представляет аще убо всем ковчезе суть осмь предреченных спасателей да не боится Церковь потопа врат адских.

### **ПАРАГРАФ 3. О РАЗДЕЛЕНИИ КНИГ ОБОЕГО ЗАВЕТА.**

Четверогубо делятся вся книги обоего Завета, инны суть законныя, инны историальныя, инны премудрствия, пророческия.

**ЗАКОННЫЯ.** Законныя Ветхаго Завета, в них же законы и суды устами Божиими изреченныя изъясняются. Такова суть Пятерокнижия Моисеова; Бытие, Исход, Левиты, Числа, Второзаконие.

Нового Завета: в них же закон новы от Христа предан и таковый суть 4: Евангелия от Матфея, Марка, Луки и Иоанна.

**ИСТОРИАЛЬНЫЯ.** Историальныя Ветхаго Завета. В них же вещи соделанныя древних повествуются таковы суть: Иисуса Навина, судей, Руфь, Царств 4-х, Паралипоменон две, Ездры, Есфири, Иова, Маккавеев две.

Нового Завета, юже вещи Апостолами соделанная воспоминает деяния Апостольския.

**ПРЕМУДРОСТНЫЯ.** Премудростныя книги Ветхаго Завета, в них же разумей истинная премудрость излагается. Таковыя книги Притчи, Екклизиаст, Песнь песней, Премудрости, Иисуса Сирахова.

Нового Завета в них же премудрость Нового Завета прикладами и Заповедями еже добре по Христу жити вельми обильно преподастся. Такова суть все послания, Иакова, Петра, Иоанна, Иуды, Павла.

**ПРОРОЧЕСКАЯ.** Пророческия книги Ветхаго Завета в них же будущая предвозвещаются таковы суть: Псалтырь, Исаия, Иеремия, Плач, Варух, Иезекииль, Даниил, Осия, Иоиль, Аммос, Авдий, Иона, Михей, Наум, Аввакум, Софоний, Аггей, Захария, Малахия.

**НОВАГО ЗАВЕТА** книги пророческия в них же состояние Церкви Христовы будущее предлагаются, и суть единое удоволени книгою Апокалипсис.

**И СИЯ ВСЯ ДА БУДУТ В ЛУЧШУЮ СЛАВУ БОГА В ТРОИЦЕ СЛАВИМАГО, И В ЧИСТЫЯ ПРИСНОБЛАЖЕННЫЯ ДЕВЫ БОГОРОДИЦЫ МАРИИ И ВСЕХ СВЯТЫХ В ВЕЧНУЮ ПАМЯТЬ. КОНЕЦ.**

**ИЖЕ ВО СВЯТЫХ ОТЦА НАШЕГО**  
**Афанасия архиепископа Александрийскаго нецныи вопросы.**

ВОПРОС: что есть Бог?

ОТВЕТ: Бог есть Существо умное, невидимое же и несказанное. Бог есть Дух невещественный, око неусыпаемое и ум недвижимый. Бог есть существо содетельное всех невидимых и видимых созданий.

ВОПРОС: и колицы суть Бози?

ОТВЕТ: Един Бог богови и Господь господствующих и кроме Его несть ине. Глаголют же сы Бози человецы по благости, яко же сие азъ раб, Бози есте и Сын Всевышняго всея.

ВОПРОС: и аще един есть како глаголем Его Единаго Бога Триипостаснаго, Отца и Сына и Святаго Духа; себо три глаголем, а не единаго. Но научи нас како есть Един Бог и како паки три лица о Бозе глаголем; чюдно нам мнится сие, яко да и Един есть Бог, и три лица Его.

ОТВЕТ: слыши разумно и разумееши Святыя троицы Таинство, яко же может ум человеческий разумети. Яко мне убо мнится и не нам по силе речения глаголется сие. Бог бо Несказанный есть. И сего ради не можем постигнути Его Естество, ниже подобный нам есть единоличный. Аще бо единоличныя быв бы познали убо бехом Его, яко же познахом друг друга. Но един убо есть Бог, лица же Его три. И виждь о сем глаголемая. Яко Солнце едино есть, Солнце же имать лучи, и свет, и суть в Солнце три лица, круг, луч и свет. И круг убо есть приятелище Солнца, луча же низходящая светоявленно, ударяющая в землю, свет же просвещай и в сенновидных (*сеновный – густой, тенистый*) местех кроме лучи. И се убо три лица, круг, луч и свет не глаголем же три солнца, но едино Солнце ниже глаголем же лице едино. Аще бо вопрошен будеши, яко колико Солнца на небеси; имаши рещи, яко Солнце едино есть; аще же вопрошен будеши яко лица Солнца колика суть; имаши рещи, яко три; круг, луч и свет. Тако разумей и о Бозе. Бог убо един лица же единаго Бога три. Отца и Сына и Святаго Духа. И от сего знай, зане якоже Солнце есть триличное, тако и Един Бог Триипостасный. Образ бо Отца есть круг солнечный, образ Сына есть луч, образ Святаго Духа есть свет солнечный. И рцы сице: в Солнце круг, луч и свет. Не глаголе же три Солнца, но едино и токмо. Подобне и о Бозе Отце, Сыне и Духу Святыя. Един Бог, а не три. И паки рцы сице: в Солнце неразлучны круг, луч и свет; не бо разлучаются друг от друга сего ради глаголется едино Солнце, а не три: и сего ради глаголется и един Бог, а не три. Понеже неразлучаются три лица Отца же и Сына и Святаго Духа, Единаго Бога. И якоже круг солнечный раждает лучи и испускает свет; тако и Бог и Отец раждает Сына и испускает Сына в люди; разумно яко же луч солнечный низходяй с небеси на землю, и ниже солнечнаго круга разлучается, ни же на небеси оскудевает, ни же на земли, но есть и в круге солнечном и на небеси и на земли и везде, и ни же горе оскудевает ни же доле. Тако и Сын и Слово Божие сниде наземь, и ни же от Отца оскуде, ни же от небесе, ни же от земли. Но бе и в недрах очиих неразлучныя. И горе и долу, и везде, и ни же от кого оскуде. И яко же солнечный свет есть, и в круге солнечном, и в луче, и на небеси и на земли и входит в дома и всюду и просвещает. Тако и Дух Святыи, и с Отцем есть и с Сыном, и горе и долу, и всякаго человека просвещает, и ни откуда неоскудевает. Дух бо Святыи глаголет паче вся испытует и глубины Божия се прочее, яко же его же неведомом когда, ни же знати может како бе, егда же видит образ его тогда мало разумеает начертание лица его. Тако ми разуме и о Бозе. Бога бо ни кто же виде когда, како убо его постигнути может. Но понеже свет есть и именуется Бог. От чувственная сего света и образует его. Яко же прочее яко предрехом во образ Солнца начертывает Святыю Троицу, глаголюще быти Отца убо круг, Сына же луч, Духа же Святаго свет от Света.

И якоже круг и луч и свет едино суть, и три нераздельно разделяема: тако и Бог Творца, Отец и Сын и Святыи Дух. Едино есть и три разделяема убо лица, по Солнцу нераздельна же естеством пребывающая, и яко же круг Солнца един есть виновен и нерожден, луча же вина и рожденна от круга, свет же исходе от круга токмо, луч послан и просвещай земная. Тако и Бог и Отец сам Един есть виновен двема и нерожден. Сын же от единаго

Отца винимья и рожден. И Сам Дух от Единого Отца винимья и исходящ, Сына же в мир посылаем и тако име и разуме и веру о Бозе.

Аще же не довлеет тебе изображение солнечное в познание Триипостасного Божества, виждь и ине образ Божий. Есть же душа человеческая. Егда бо хотяще Бог создати человека рече. Сотворил человека по образу Нашему и подобию. Се прочее человек образ есть Божий. Сиречь душа человеческая. Есть же душа человеческая, едина убо, триипостана же, три лица имадша. И како услыши, есть душа единоголице. Душа же раждает слово, и се слово ино лице; душа испуща есть и дыхание и се дыхание иное лице. Се лица три, душа, слово и дыхание. Ибо слово и дыхание души суть, не телесе, понеже души изшедшей от тела, ни же слово пребывает в телеси, ни же дыхание: но лежит тело и бездыханно и безсловесно. Слово же и дыхание суть с душою. И от сего яве есть, яко и слово и дыхание от души суть и души лица суть. И се прочее душа лице едино, и слово иное лице и дыхание иное лице. Се три лица души, но душа едина, а не три. Аще бо вопрошен будеши, колико душ имать человек, имаши рещи яко едину. Аще же вопрошен будеши и колика суть лица души пристоят; да рещи, яко три. Понеже душа, слово и дыхание, едина душа и лица три. И есть убо душа во образ Отца, слово же души во образ Сына, и слова Божия. Дыхание же души во образ Святого Духа. Яко же бог душа нерожденна, тако и Бог и Отец нерожден: и яко же слово рожденное от души, тако и слово Божие рождено от Отца, и яко же дыхание исходное от души: тако и Дух Святой исходит от Отца. И рцы сице: душа, слово и дыхание. Едина душа, а не три.

Неразлучное бо Слово и Дух Божественный от Отца и якоже невидима душа, тако и невидимый Бог. И сице егда сумнишися во уме твоём, и глаголаши, како есть Бог Един и Триипостасный; помысля и глаголи: яко же душа моя есть едина, но и триипостасная, душа. Слово и дыхание, тако и Бог Един есть, но есть и триипостасный Отец, Слово и Дух Святой. И глаголя во уме твоём, яко аще душа творение Божие. Подобне и Солнце есть триипостасное, естество есть едино. Кольми паче Богу Творцу сих несть ли еже быти сице, яко же быти Ему Единому Естеством и Триипостасну лица, и во истинну есть. Яко бо душа, слово и дыхание, три лица, и едино естество души; тако Отец, Слово, Дух Святой, три лица и един естеством Бог а не три бози.

Сице аще смышляеши всегда, непохулиши на Святую Троицу. Но паки и ине образ Божия слыши возлюбленне. Се огонь Един есть но и триипостасный. Сам убо един есть подлежащее огню, палительное же его иное лице и просветительное его, иное лице: се прочее три лица Единого Бога: сиречь подлежащее огню и палительное, и просветительное едино же естество огня, а не три. Подобне и о Бозе. Отец бо есть огонь, Сын палительное и Дух Святой есть просветительное. И яко же во огни: огонь палительное и просветительное: и самое подлежащее огню един глаголем, а не три: тако глаголем и образе три лица, Отца же и Сына и Святого Духа, Бога Единого глаголем, а не три. И о разуме ни убо Святыя Троицы довлеют сия верующим. Обаче слышы и иное к сим таинство.

Слово человеческое сугубо имат рождение, и двема ношения раждается: едином убо ношением раждается от души, другим же от устен, и раждается убо слово человеческое от души. Егда помышляет что рещи: помышление бо первое рождение глаголется слова, понеже помышляет еже рещи оно слово. Не глаголет же сие устами, но хранить слово душа в недрах своих, и есть помышление оно первое рождение слова от души, обаче аще и родится слово от души, первым рождением егда помышляет сие душа, но не являет его, паки же хранит его.

Егда же восхощет явити слово, тогда раждает его от устен. Сие от устен второе рождение слова, сие рождение являет ново во всех и не к тому прочее слово неявленно глаголется, но явлено. Егда же родится слово устами, тогда вси слышат его, и явленно бывает всем. И глаголется сие рождение устами, второе рождение слова. Якоже два суть рождения слова нашего, едино убо от души, егда помышляет, еже возглаголати слово, еже первое рождение глаголется, и ино от устен, еже являет слово всем человекам, еже и второе рождение глаголется.

Навыкни убо известно, яко же слово человеческое два рождения имат. Едино от души и ино от устен: тако и слово Божие два рождения имат, едино убо от Бога и Отца, еже и первое рождение глаголется, и другое от плоти, еже и второе рождение глаголется. И яко же слово наше, аще и раждается первым рождением от души, но обаче неявленно есть и не является, но паки по рождении пребывает в недрах душевных. Тако и слово Божие, аще

и родися прежде век от Бога и Отца, но не являшеся человеком пребываше же паки в недрах Отчих, и яко же наше слово егда хоцет раждается от устен наших, и является во всех приближающихся нам: тако и Слово Божее, егда благоволя родитися от пророческих устен и от Пречистой Марии, и тогда бысть явленно во всем мире; яко же бо раждается наше слово рождшееся от устен наших: такожде и Божие Слово рождшееся от плоти присно Девы Марии, явися всей твари, и веровавший Ему спасаются и може наше слово рождшееся от устен наших, егда от смех устен раждается, ни же от души оскудевает, ни же от своих устен, ни же от ушес слышащих: но есть и в душе, и во устах наших, и во ушах слышащих, и нетокуду неоскудевает, аще бы и тысецные тысящи услышали слово, не умалается слово, но проникновена исполнено есть: тако и Божие Слово, аще родися от Девы Марии, и от устен пророческих, но убо ни же от Отца оскуде, ни же от плоти, ни же от всех человеков, ни же от всея твари: но везде бысть и неумалися, но преисполне бе. И тако разумей о Бозе и слове, яко сугубое имать рождение, едино от Бога и Отца, едино от плоти. И еже убо от Отца превечное, а еже от плоти, в последняя дни. Яко же и наше слово перве раждается от души и тогда от устен, и сия о двое рождения слова Божия.

ВОПРОС: что есть общее Святыя Троицы?

ОТВЕТ: общее, существо, обще безначальное, общее сила. Благодсть, мудрость, правда, вся бо равне имать Отец и Сын и Святыи Дух, кроме свойств их. Свойственно бо есть Отца нерождение, Сына рожденное, Духа же Святаго исходное.

ВОПРОС: в Бозе колика суть существа исповедуеши?

ОТВЕТ: Едино Существо глаголю, Едино Естество, Един Зрак, Един Род, Едину Силу, Едино Достоинство и Господство.

ВОПРОС: Ипостаси же колики исповедуеши в Бозе?

ОТВЕТ: Три Ипостаси исповедую, Три Лица, Три Свойства, Три несекома (*непричастный делению, неделимый*), и Три Начертания (*начертавати – творить подобие чего-нибудь*).

ВОПРОС: чесо ради Отец, глаголется Отец?

ОТВЕТ: Отец глаголется Бог, яко вся соблюдая, аки всех блюститель.

ВОПРОС: в Бозе колика виновная?

ОТВЕТ: Едино виновное (*виновный = бывший главною причиною чего-либо*) в Бозе глаголю, и сие есть Отец: Сам бо Отец раждает Сына и испущает Духа. Прочее разумей, яко Отец Един есть виновен: Сын же несть виновен, но винимый (*винимый = который имеет вину, т. е. начало своему бытію*): яко же убо виновен есть то един Отец, винима же два, Сын и Дух, виновен же глаголется Отец, зане раждает, а не раждается, испущает, а не испущается, раждает убо Сына: испущает же Духа Святаго. И сего ради глаголется Отец виновен.

ВОПРОС: и коликая винимая?

ОТВЕТ: винимая два, Сын и Дух. Не раждает Сын, но раждается, и сего ради глаголется виним, аще убо кто вопросит, яко в Бозе колика виновная исповедуеши; рцы, Едино виновное глаголи. Иное есть сие; Отец и чесо ради глаголется виновен Отец зане раждает Сына и испущает Духа.

А еже впросит тя, яко колико винимая глаголеши в Бозе; рцы два; Сын и Дух. И чего ради глаголется винимая, зане раждается Сын, а не раждает; исходит же и Дух, а не испущает.

ВОПРОС: во Святей Троице Кто первый?

ОТВЕТ: во Святей Троице никтоже первый и никтоже последний, но купно Отец, купно Сын и купно Дух Святыи; и сего ради и Собезначальныя глаголется и Безначальный. Безначальное же глаголется, еже прежде начала сущее. Безначальный убо Отец, Безначальный Сын, Безначальный Дух Святыи. Ни же убо первый, ниже убо последний: но купно три, Отец, Сын и Святыи Дух. Сего ради и собезначальный и суть и именуется.



ВОПРОС: яви нам и сие, како Сын и Слово Божие раждается от Отца; сие бо ужасает нас?

ОТВЕТ: понеже Бог незримый есть и несказанныя ни же сказати можем. Како бо кто сказати может, еже никогда же сам виде или от иных слыша когда: обаче от творения Его. Глаголю слова и Бога образно да речем. Елико еже по силе разумети убо достоин, яко же слово человеческое раждается от души безсеменно и недомысленно: тако же и Слово раждается от отца. И яко же раждается огонь от огня и свет от света, такожде раждается Сын и Слово Божие от Отца.

ВОПРОС: и Святой Дух како исходит от отца?

ОТВЕТ: подбает тебе и о сем невопрошати. И сие бо несказанно, обаче навикай и о сем яко же убо дыхание человеческое от души исходит, тако и Дух Святой от Отца исходит. И яко Ева ни же рождена, но посредственнее: тако и Дух святой от Отца исходит, ибо Адам нерожденный, Сиф же рожденный и Ева исходная. Ибо Ева ни же родися, яко родися Сиф, ни же рождена бе, яко же Адам: но изыде от ребра Адама. И бе Адам нерожденный во образ нерожденного отца. Сиф же рожденный, во образ ражденного Сына. И Ева, исходяй от ребра Адама, во образ Святаго Духа. В праотцев бо наших изобразися Святаго творца. Но Адам убо и Сиф и Ева человеки быша и разлучны быша от друг друга: Бог же и Отец и Сын и Дух Святой ни же телеса чуть, ни же разлучны суть друг от друга. Един бо образ нерождения оча зрится. В нерожденном Адаме: и образ рождения Сыновна в рожденном Сифе: и образ исхождения Святаго Духа, зрится во исходне Евы. И тако разуме и о сем.

ВОПРОС: егда вмещается Бог во едином месте или ни?

ОТВЕТ: приложи ум твой и разумей, яко Бог есть Свет Неразличимый и Невместимый, ни же зрится Бог, ни же вмещается где. И понеже невмещается во все, како есть мощно явится или разумеется некими. Его же ни же Моисей Боговидец, ни же ученицы Слова Его на горе Преображения Онаго, ни и некогда возможет Божество зрети. Яко же яже есть, не во едином месте вмещается, но везде есть Бог. И сия бо убо о богословии: от себе же начнем глаголати и о смотреии сия есть о воплощении Сына Слова Божия.

ВОПРОС: се вопрошение от чесо вопрошаю, ты же мне отвеща. Научи еси нас о Святом Творце, яко Бог Триипостасный есть, и яко Отец, Сын и Дух Святой, ныне же вопрошаю тя, сей Христос, Кто Есть; о сем хочу навикнути.

ОТВЕТ: весьма слыша еси о Святей Троице, яко Единое Лице нарицается Отец, другой же Сын и иное лице глаголется Дух Святой. Се прочее разумей, яко сей Сын и Слово Бога и Отца одевша плотию человеческою и ходи яко человек на земли: именовати убо Христос, зане помазан бе, сиречь носи плоть человеческу. И сего ради глаголется воплощенный Бог и Христос Сын и Слово Божие и Бог зане носи человеческий зрак.

ВОПРОС: якоже слово или какую потребу имаше Бог, сиречь Сын и Слово Божие, еже воплотитися, и яко человек ходити по земли?

ОТВЕТ: Бог ни едину потребу имаше, еже воплотитися, но человечество требоваше врачевания. Понеже бо сотвори Бог Небо и Землю и вся яже в них. Созда же и человека и положи его посреде рая и учини его царя над всеми созданий, да вся поработает ему. И жити его в раю, яко Божиему образу. Ведый сие диавол и завиде достоинству человеческому, советова тому человеку преслушати Бога, да преслушанием изженет его от рая и достонства Божия и смертна безсмертнаго соделает. Человек же яко не имея искушения слов, лукавого послуша совета диавола и преслуша Бога.

И от толе приять смерть греха. Подобно и вся от оного бывшия человецы, аки от прародителей грех приемше, удержаша сей и укрепишя грех на человеке. Посла же Бог пророки и учителя в мир, да научат мир, сиречь человеки, и обратят от греха, и невозмогаша пророцы исправити. Сего ради рече Бог в себе, сниду и понесу плоть и буду человек зрачен и научу создание мое, и возвратится от совета диавола, и будет всяк человек яко Бог. Не по естеству, но по положению. И сие восхотев Бог благоволением Отца и содействием Святаго Духа сниде Сын и Слово Божие, и вныде в Святую утробу Девы жены, и прием плоть от нея, вочеловечися, и паки от жены изшед, и оставль ю чистою и запечатленну Деву, не скверною яко же прежде ходя в мир с человеки, яко

человек и тогда именована си Христос, за еже помазатися же и носити плоть человеческую. И сея есть Христос, Сын и Слово Божие, плоть носяи.

ВОПРОС: и како бе возможно плоть деве родити и паки деве пребыти; и сие чудно нам и зело ужасно является. Научи нас о сем молим.

ОТВЕТ: аще и чудно вам мнится сие но не человеческое дело, Божие же. Идеже бо хочет Бог, побеждается естества чин. И паки: дивен Бог и чудна Дела Его. Обаче услыши о рождшей Деве различная и явственнейшия знамения. Помени яко девственный сый Адам Еву роди, и паки девственно пребысть: тако и Богородица Мария Дева сушая роди Христа и паки Дева пребысть. Но и ино ко всему слыши Таинство. Яко же дом ограждаен от всюду, восточное имеяй стеклянно еже чистое и тонкое оконце. Возсиявшу Солнцу лучи его проходить стало. И входят весь дом просвещающие: и паки преходящу Солнцу и лучам исходящим, стекло не сокрушается, но невреждимо от восходящих же и исходящих ударения солнечных лучей пребудет. Такому разумей и о присно Деве Марии. Сия бо Пречистая яко дом сущий огражден. Сын и Слово Божие яко луч Божественный от Солнца Правды Отца низшедый и стекляным оконцем ушес. Сам вшедья Пречистыя Дом Ея просвети и паки яко же весть Сам изыде не осквернив девства оныя весьма: но яко же прежде рождества и в рождестве и по рождеству Деву чисту сохрани, с сими же и иное светосиятельное и предивное и оным подобное слыши изображение. Бисер в Чермном море бывает. Бывает же сице брези Чермнаго моря сухи суть, малыя воды лиянием имуще: собирают же ся тамо трепокажная морская некая во всем Чёрном море оном пияны именуемая. Стоят убо пияны оныя присно зияющия и ожидающии брашна в пищу свою, частым бываемые тамо молнийны отверзсты входит в ню. Пии каже абие сопрятаема и стягаема, в себе внутрь заключает молния. Молния же огустеваема во очесех пияны, просвещает я и вторит бисцы. Исходящи же бисеры. Опияны падают на брезу моря онаго и тако обретают ю ищущих такоми разумей и о воплощении слова.

Море убо есть мир и Дева чрев. Стояще же Дева яко же пияна вераме ожидающая небеснаго хлеба Христа Бога иже и низшедший и вшеды в Ню, яко молния и обвився во утробе Ея, световидну устрои Пречистую Плоть, ю же прият воплошя. И тако родися из Нея яко чистый и многоценный бисер Слово Божие, кроме смешения мужеска и яко же бисер Небесный и земный. Небесный убо по молнии, земный же по сплетению очес пияны: тако и Христос, Небесный есть и земный. Небесный убо по Божию естеству: земный же по человечеству. И яко же бисер составляется кроме смешения мужеска и женска, от молнии и пияны: тако и Христос родися без смешения. Мужеска и женска от Божества и плот двойственный. И яко же бисер сокрушаемый, многожды убо вещество очес пияны сокрушается и разрушается, а не светлость молнии страждет. Но убо светлость молнии безстрастна пребывает, вещество же очес пияны едино сокрушается и страждет: тако и о Христе подобает тебе разумети. Биену бо ему Спасу нашему и страждущу от неверных иудей на кресте, вещество убо плоти, сиречь человечество, едино пострада, Божество же безстрастно пребысть. И сия глаголя заграждаещи уста Богостраждец. И воплощенному научаеши смотрению, от сюду тебе возлюбленне Благодатию Христовой сумненное разрешается.

ВОПРОС: се сия всем богоподбныя оча прилично нас научи еси. Молим же тя, да и сие нам скажеша недоумеваемое, чесо ради Божество токмо не научи человека, и Спасе его кроме плоти. Почто бо восхоте понести плоть?

ОТВЕТ: и о всем добре вопрошаеши, тем же и добре услыши ответ. В начале егда сотвори Бог человека, и прелстися от диавола человек, непобеди диавол Божество, но человечество. Тем же и подобаше паки ему победшуся человечеству и паки сие победит врага своего диавола, и паки да примет о нем, прежде погубившаго Божественный рай. Аще бо нагое Божество пришло, и победило диавола, хотяще похвалитися диавол, зане не дивно аще и победися, от Божества бо низвержен победися и сего ради не изволи Бог, да нагое Божество Его преодолет диавола, но восхоте да человечество победшуся от диавола, само и едино победи победившаго сие диавола. Убо паки премудрый Бог, яко неложаше едино человечество победити кроме Божества, скрыся в той плоти Божество, яко диавол зря плоть и неведья яко в сей плоти Божество есть сокровенно, приидет и приборствит Христу, и тако победится от сокровеннаго Божества, еже и бысть. Яко же бо

рыбак хотяи уловити рыбу, не нагую удишу вмстает ест в море, но облачит от вне червем, лестию удицу, и тако вмстает ю в море облеченну червем. Рыба же зрящи червь един и ведуци яко червь посреде себе имать удицу, но мнищи кроме удицы червя быти, точию прельщаема, удицею держайма бывает. Тако и Христос сотвори: восхотев бо уловити в безмерных водах бездны крившуюся ядометную рыбу, или паче великаго змия диавола, не нагое Божество Свое диаволу принесе, но лестия черву Пресвятую Свою Плоть, вниде от Присно Девы Марии. Скрыв Священнейшую удицу Мироспасительный Свой Крест. На ней же пригвождя и тем утаити восхотех Свое Божество, от него прельстившаяся и удержавшая ядометная и угрызательная сия рыба, великий змий, диавол и же из Рая изгнанный и умертвивый человека, побежденный погибе. Яко же Божество убо во образе удицы ест. Человечество же во образе червя, узревый убо диавол от вне человеческое и неразумевый в нем от внутрь сокровенное Божество, пришед к человечеству, удержаясь от неуподобительных непобедимых удицы Божества: и тако победися великий змий диаол.

Сего ради не прииде Сын и Слово Божие нагим Своим Божеством уловити диавола, но понеже плоть, и тако вниде; и сия ест вина, еже быти воплощению. И елико же той диавол восхотевый иногда прельстити человека, от рая отвергнути, не приступый к Еве нагим своим диавольством, но понеже плоть змиину. И тако приступив прельсти ю. Види бо сие льстец, яко аще бе приступив прельстити ю; и сего ради одейся яко плотию змией, и плотоносным змием Еву прельсти. И змия убо являшеся диавол же не являшеся, и являшися змием действоваши незримых змия диавол.

Два бо естества во едином лице не ведоста тогда диавольство и змиевство, два естества во едине лице соединистася, и едино убо естество, сиречь змиевство являщей, другое еже , сиречь диавольство не являшеся, и извергоша человека из рая. Тако и в Христе два Естества в едином лице. Божество и человеческо соединистася. И человеческое убо являшеся, Божество не являшеся, и являемое человечеством Божество действоваше незримое, и от рая древле изгнанныя человека, добра два естества сии, божество глаголю и человечество. В него паки и ныне вхожиста. И сия ест вина ею же Бог воплотися и бысть человек. Яко Тому подобает Слава в безконечных веки. Аминь.

### **ТОГОЖДЕ АФОНАСИЯ ПАТРИАРХА АЛЕКСАНДРИЙСКАГО БОГОСЛОВНОЕ ИЗЛОЖЕНИЕ О ВЪРЪ.**

Иже хочеть спастися, прежде всѣхъ подобаетъ ему держати Кафолическу вѣру, ея же аще кто цѣлы и непорочны не соблюдаетъ, кроме всякаго недоумѣния, во вѣки погибнетъ.

Вѣра же Кафолическая сия ест: да Единаго Бога в Троице, и Троицу во Единице почитаему: ни же сливающе Ипостаси, ни же Существо разделяюще.

Ина бо ест Ипостась Отчая ина Сыновня, ина Святаго Духа. Но Отчее и Сыновнее и Святаго Духа едино ест Божество, равна Слава, Соприсносущно Величество. Яковъ Отце, таков и Сын, таков и Святыи Дух.

Непостижим Отец, Непостижим Сын, Непостижим и Дух Святыи. Вечен Отец, Вечен Сын, Вечен и Дух Святыи. Обче не три Вечных: но един Вечныи. Яко же ни же три Несоздания, ни же три Непостижимых, но Един Несозданныи и Един Непостижимый. Подобне: Вседержитель Отец, Вседержитель Сын, Вседержитель Дух Святыи. Обаче не три Вседержителя, но Един Вседержитель. Тако Бог Отец, Бог Сын, и Дух Святыи: обаче не три Бозии, но Един Бог. Равне Господь Отец, Господь Сын, Господь и Дух Святыи. Обаче не три глаголим, но Един ест Господь.

Зане, яко же особенно куюжду Ипостась Бога и Господа исповедовати, Христианство истинно понуждается.

Отец ни от кого же ест сотворен, ни создан, ни же рожден.

Сын от Отца Самаго ест, не сотворен, ни создан, но Рожден.

Дух Святыи от Отца, не сотворен, не создан, ни же рожден, но исходящъ.

Един убо (есть) Отец, не три отцы. Един Сын, не три сына. Един Дух Святой, не три духа. И в сей Святей Троице ничтоже первое или последнее. Ничтоже более или менее есть. Но целы три Ипостаси Соприсносущны суть себе и равны. Яко же предреченная Троица во единице, и единица в Троице почитается. Хотяй убо Спаситися, тако о Святей Троице да мудрствует.

### **О ХРИСТЕ.**

Но нужно есть к вечному Спасению да и о воплощении Господа нашего Иисуса Христа известно веруем. Есть же правая вера, да веруем и исповедуем: яко Господь наш Иисус Христос Сын Божий, Бог и человек есть. Бог от Существа Отца прежде веков рожденный: и человек есть от существа материнскаго, во времени рожденный. Совершенный Бог и совершенный человек, от души словесная и человеческая плоти состояй. Равен Отцу по Божеству, мния (*представление*) Отца по человечеству. Иже аще и Бог есть и человек, обаче не два, но един есть Христос.

Един же не пременением Божества в плоть, но восприятием человечества в божество. Един всяко, неслиянием естеств, но единством Ипостаси. Яко же бо душа словесная и плоть, един есть человек. Тако Бог и Слово Един есть Христос, пострадавый Спасения нашего ради, и сошеды во ад, и в третий день Воскресый из мертвых, и вошедый на Небеса и седи одесную Бога Отца Вседержителя, откуда же придет судити живыя и мертвыя. Его же Пришествием вся человецы воскреснут с телесы своими и воздадут от своих делех ответ: убо благая содеявшия пойдут в жизнь вечную, злая же, во огонь вечный. Сия есть Кафолическая вера, ея же аще кто верно и известно верити не будет, Спаситися невозможно.